

26 MAR 1996

Mahathir-Perjanjian

M'SIA DAN NEW ZEALAND METRAI PERJANJIAN PROGRAM PERTUKARAN BELIA

Oleh: Syed Jamil Jaafar

WELLINGTON, 26 Mac (Bernama) -- Malaysia dan New Zealand hari ini menandatangani perjanjian untuk mengadakan program istimewa bagi pertukaran belia yang dijangka mempertingkatkan lagi persefahaman antara rakyat kedua-dua negara.

Memorandum persefahaman (MoU) mengenai "Peraturan Percutian Bekerja" itu ditandatangani oleh Menteri Pendidikan Datuk Seri Najib Tun Razak dan Timbalan Perdana Menteri dan Menteri Luar New Zealand Don McKinnon.

Peraturan itu membolehkan belia Malaysia dan New Zealand berumur antara 18 dan 30 tahun untuk bercuti di negara satu sama lain sehingga enam bulan lamanya dan semasa tempoh itu, mereka dibenarkan bekerja untuk menampung keperluan perbelanjaan perjalanan mereka.

Program itu dicadangkan oleh Perdana Menteri Jim Bolger ketika beliau melawat Malaysia pada 1994.

Perjanjian itu merupakan antara empat perjanjian yang ditandatangani sempena lawatan empat hari Perdana Menteri Datuk Seri Dr Mahathir Moahamad ke negara ini mulai hari ini.

Dr Mahathir, yang menyaksikan majlis menandatangani perjanjian-perjanjian itu bersama-sama Bolger di Bangunan Parliamen, kemudian menyatakan bahawa Malaysia menyokong penuh cadangan Bolger itu dan berharap program itu dapat dilaksanakan secepat mungkin.

Tiga lagi dokumen yang ditandatangani ialah mengenai kerjasama pendidikan, pertahanan dan bantuan TV New Zealand (TVNZ) kepada Radio Television Malaysia (RTM).

MoU mengenai pendidikan ialah bagi memudahkan perhubungan dan kerjasama antara institusi pendidikan di kedua-dua negara dan meliputi perkara seperti proram berkembar dan pengiktirafan ijazah.

Ia ditandatangani oleh Najib dan rakan sejawatannya Wyatt Creech.

Peraturan kerjasama pertahanan ditandatangani oleh Ketua Setiausaha Kementerian Pertahanan Datuk Azizan Hussain dan Setiausaha Pertahanan New

Mengikut peraturan itu, satu Kumpulan Penyelarasan Pertahanan Malaysia-New Zealand akan ditubuhkan untuk mengawal semua aktiviti yang sedang dijalankan.

Kedua-dua negara mempunyai kerjsama yang sekian lama dalam bidang pertahanan, sebagai anggota Peraturan Pertahanan Lima Kuasa (FPDA) bersama-sama dengan Britain, Australia dan Singapura.

MoU mengenai penyiaran ditandatangani oleh Ketua Setiausaha Kementerian Penerangan Datuk Zawawi Mahmuddin dan Pengerusi TVNZ Norman Geary. Ia bertujuan membolehkan TVNZ membantu RTM dalam memainkan peranan sebagai pusat penyiaran bagi Sukan Komanwel 1998 di Kuala Lumpur (Sukom KL '98). --

BERNAMA

SJ NMO